


墓誌
行狀



潜谷先生碑銘
全



潛谷先生神道碑銘

大匡輔國崇祿大夫議政府領議政兼領
經筵弘文館藝文館春秋館觀象監事

世子師李景奭 撰

男資憲大夫兵曹判書兼同知 經筵成

均館事佐明謹書并篆

有明朝鮮國大匡輔國崇祿大夫議政府領
議政兼領 經筵弘文館藝文館春秋館觀
象監事 世子師 贈謚文貞金公神道碑
銘并序

孝宗大王即位之九年戊戌九月四日原任領議政金公易簣于會賢洞正寢春秋七十有九余為撰易名之狀公之孤又屬以隧碑之刻容戚而辭懇終不敢以不才辭謹按其狀序而銘之公諱堉字伯厚號潛谷金出新羅羅季王子避住于清風其後仍為郡人自麗比我朝世有衣冠高祖諱湜以學行名魁薦科累官至成均館大司成與趙靜菴為道義交禍于己卯贈吏曹參判曾祖諱德秀屏處而終 贈吏曹判書祖諱裴宰三邑著政聲卒官軍資監判官

贈議政府左贊成考諱興字弱冠中司馬兩
試業于牛栗兩先生之門薦授齋郎不就蚤世
贈議政府領議政配漢陽趙氏 贈貞敬夫

人縣監希孟之女生公于萬曆庚辰幼甚聰穎
五歲受書輒能誦甫過戲從贊成公于江東東
閣適值曹公好益遷居公師之恒刻苦整飭不
好戲侍議政公于廬居閒雞而興兀然孜孜雖
當壬辰之難避地山谷袖不去書文辭蔚然有
致牛溪先生大贊之甲午議政公疾革謂公曰
汝能樹立地下吾猶喜也公早孤且丁兵荒奉

大夫人播流湖甸負麥以為養繼祖母金氏留
海西公常徒步往省外除未幾哭繼祖母庚子
又哭大夫人奉遷議政公之墓于先山而合葬
焉躬負土襄事徒行哀展鄉里莫不感歎卒喪
毀久未復乙巳始中司馬冠科試名益彰館學
請從祀五賢輒推公為首文出公手多鄭仁弘
肆詆晦退兩先生公為掌議與多士削仁弘儒
籍光海怒錮其首公將自當會有大臣言事寢
公見時事日非大歸加平躬耕潛谷因以自號
作詩文以見志十年而為癸亥 改玉初舉遺

逸拜金吾郎甲子春适賊叛 大駕南幸犇覲

行在引見超叙監陰城縣疏陳宿弊其歸以
民安則國安為要優獎之閔雨禱而雨均溝塍
以正經界嘗魁增廣初試是年秋中會闈高等
又魁 殿試十月徵以正言民樹頌德碑自是
冬至乙丑丙寅以典籍遷歷兵曹佐郎持平司
書文學兵曹正郎知製 教無弼牌廳郎直講
獻納而春坊薇垣栢府則暫遰旋拜者數糾迭
敢言勲戚憚之爭臺官之被譴寬校生之急汰
譚者多之丁卯春拜文學時西警甚急公請罷

號牌以鎮民從 世子南既而陪入江都移兵
曹夏還都為持平直講李公弘胄儉胡太監辟
公從事諳西事甚熟疏奏民情之向背城守之
險易數百千言又為體府金相瑋所辟視師南
徼請分嶺南三路以便節度為圖上之戊辰為
修撰校理獻納秋拜吏曹佐郎陞正郎己巳辭
逋旋授是時金世濂有銓望而郎議矛盾公欲
調停反遭下理坐黜歸楊根以講官勞 賜臯
比買田構數椽蕭然自適壬申叙拜修撰校理
還吏曹陞應教 仁穆王后薨為 山陵都廳

歷檢詳舍人輔德應教改司諫用 山陵勞進
階拜軍職仍知製 教癸酉以兵曹叅知移同
副承旨轉右副遠出安邊府使勸學勵兵蕩逋
租養高年以治最 聞賜表裏丙子官滿差賀
至使衆憚海役而夷然就途八月泊南汛口時
清兵已薄 皇都都督陳洪範擁兵關外公移
書激以大義洪範慙其軍十一月趨京海宇震
蕩公獨趨聘禮部尚書姜逢元勞問節日俱許
叅禮異數也丁丑二月竣事還例有宴禮公以
喪 國母辭焉又辭其折銀聞 本國被兵東

向痛哭華人感涕前後呈文閣部者十數為白
我國之情 帝嘉本朝之誠閔其力詘優加
賞賚勅兵部以兵二千護出于海道拜兵曹叅
議復 命辭遹由禮曹入銀臺見 上教有不
平封還已而辭遹戊寅拜判決事移禮曹兼槐
院副提調乞免而引匪風之語辭甚悲惋無何
觀察湖西亂後歲惡民益困志切均役通計道
內田案量收米布以為凡百需用上供及留儲
視前有裕而賦役太半省焉名曰大同䟽請行
之為朝議所格己卯秩滿拜西樞改承旨庚辰

遼為刑曹蕪大司成由兵曹還承旨者凡五後
復數遷銀臺玉堂諫垣騎省地部癸未春在玉
堂因災異之重劄陳修德之要言甚剴切夏又
為右承旨無何 特授右尹陞嘉善遷副提學
都承旨秋選為元孫輔養官提舉書雲冬十月
拜兵曹叅判蕪右副賓客十二月陪元孫入瀋
甲申春燕京陷秋奉元孫而東沿路省弊 上
稱以長者以小宗伯為祭酒 特加嘉義辭免
拜吏曹叅判蕪揔管備局宣惠之任冬擢判刑
曹蕪右賓客乙酉清使護 昭顯世子出使公

儋西來首譯憚其簡

昭顯卒監封墓撰哀冊

賜廐馬累遷右叅贊大司憲禮曹判書兼內局提調適禮曹復拜右賓客丙戌春上因論

姜氏罪

下嚴旨于賓廳公隨大臣胥

命闕

門外

上益怒適公職及內局提調奉使之燕

明年留守松都政先誘掖教訓多士重新學宮之兩廡釋菜必躬即圃隱殉節地立成仁碑刊布魯論正文孝忠全經優老彰善羣情咸悅及歸有攀轅之慕已丑入耆老社夏五月仁祖禮陟公權判禮曹造次措辦禮無欠缺進拜右

議政辭未獲出又屢辭 敦諭不許冬焚黃于
先塋仍留庚寅春乞致仕連上八疏再 遣承
旨諭以予之視卿如砥柱卿之求退如急流公
辭曰捨一介老病之臣成 聖朝退讓之風豈
非義事乃 許適不許退拜領中樞奉 命再
赴燕既還即出平丘乞骸蓋懇又上章陳弭灾
之道末言漢以地震而釋勝霸今當天變而罪
諸臣時相臣儒臣有被譴者故云辛卯春清四
使出是時領相李敬輿因嘖言去位公代之蕪
訓鍊軍資都提調固辭 召命繼降遂入城接

清使秋乞遶 不許清使又至疆出以應冬有
原任為首相公以次拜左揆癸巳夏蕪內局都
提調 上久不豫退輒宿朝堂復常始歸家冬
蕪 世子傳甲午進首台旋解乙未復拜辭遶
三為上相終免而後已以領敦寧府事乞退益
力而未遂焉其摠裁 仁祖實錄追修 宣廟
朝史從 親禱 社雨監 祔廟冊禮暨 侍
藥院皆蒙鞍馬之 賜公嘗以安民須先大同
及大拜申陳必行之意揣摩研究書進備悉
命行之湖西湖民歡忭相與建穹碑以頌之方

其議也訾謗橫起山立不動終底于成君子謂
法固良矣誠似公難矣且行請於湖南入告眷眷
退而寢疾乃上遺劄勉以典學保民而復致意
於湖南大同語甚切蓋臨沒而誠益篤也計

聞震悼輟朝三日

贈祿有加承旨

賜吊禮

郎致祭

王世子遣宮官吊祭官庀襄事諸書

院儒生相繼來哭湖民尤悲哀十一月葬于楊
州先山金村里巽向之原 賜謚文貞公資性
剛勁操履端確燕居危坐終日不懈少喜劇飲
一聞先公之戒惕然悔改非有 宣賜不復飲

晨必禮廟奉寡姑友弱弟敬愛備至屏遠聲色
食無蕪味修睦親契並讌中表為外遠祖趙良
節公初祠宇撫曹公好益孤久而不衰白 上豎
李統制舜臣神道碑于其墓自銘之幼時讀書
至一命之士苟存心於愛物於人必有所濟深
有所感發窮居亦思濟世為學必務知行立朝
以來有懷輒達或抗章或造膝傾倒底蘊雖被
峻 旨無所撓詘如安興之築城束伍之給保
御營軍之適上營將之別設慮其擾民並請停
罷欽敬閣故基將造萬壽殿極諫其不可言雖

未能盡行

上嘉其忠鯁恐朝著之不靖則李

時楷以諫長被斥陳母子之相離則朴長遠自
北塞而移配金弘郁因論姜獄陷大何白其可
原具綾川仁垕繼達而抵罷公乞同罪不得則
力辭解職行錢用車皆所建請而未得施常以
為慨射法變舊則亦嘗憂之而力達焉 上追
念其赤心臨筵歎曰安得堅確不撓如金領敦
寧者乎晚家終南下堂曰拱極亭曰偃僂以寓
意前卒之一月大星隕日者預為公憂病欲見
客必冠臨卒精神不變其素定如此在湖西刊

救荒撮要辟瘟方請分布諸道鋟已卯八賢傳
及黨藉內外世譜嗜書博涉雖在銀臺夙夜之
暇輒親緗素旁通地志兵略卜筮之方嘗論西
洋曆法上泝歷代改曆源流如指掌年逾耆艾
程課不輟好著書入燕有感慨錄集杜詩又著
皇明紀略類苑叢寶種德新編海東名臣錄已
卯錄松都志一卷行于世攷事增刪潛谷筆譚
詩文若干卷藏于家貞敬夫人坡平尹氏高麗
三韓功臣莘達之後成均進士 贈吏曹叅議
諱汲之女天性婉淑少通內訓小學大義二十

歸公公有姑與兩妹事之如尊章愛之如同氣
手執女紅資昏嫁供祀事撥匱為備不令公憂
身不衣錦貴而無變及抱未亡之痛溢米絕不
御禁中旁側人以內命來欲其少回見哀號
不忍發口已亥二月二十日卒壽七十五四月
一日祔公墓生二男四女男長佐明重擢文科
今判兵部季佑明國舅封清風府院君領敦
寧府事女適金崇文士人黃道明僉正徐元履
咸鏡監司尹鎡監役判書一男錫胄魁文科典
籍一女適趙顯期生貢府院君四男二女男長

萬胄夭次錫翼錫衍錫達皆幼元女即 王妃

殿下次幼金崇文無男三女長適士人柳澂次
監察李尚淵季執義吳斗寅無子子萬紀者柳
生後也餘幼者監察出一男曰鼎周者執義
出也男女各二曰鎰曰鑠長適福昌君楨季士
人李郃者僉正出也曰文重者監司繼子也四
男四女曰商隣曰商賓曰商紳長適士人鄭啓
周餘幼者監役出也噫生而為士苟有志者孰
不欲得君而濟世顧得其時難矣得其時能達
務難矣公早為讀書之善士晚為澤民之賢相

遭逢兩朝終始一誠若公雖方諸古人無所愧
焉嗚呼今不可復見矣銘曰

窮而固窮若將終焉 達為達尊澤我顛連
惟事可言公則吐之 惟袞有闕公則補之
邦本期固衆訾難惑 擬霈甘霖遍霑邦國
惟湖一路如熱先濯 有口皆碑有碑皆仰
將及于南赤子均養 公徑長逝民失其怙
後乃志成並歸摩撫 推公之績由 聖明主
聖陟賢亡天何茫茫 配有貞淑萬福之原
玉樹齊芳蘭蓀並蕃 佳氣盈門 王妃是孫

潜谷先生神道碑銘

并序

公歿而寧夫人從之

嗚呼公墓我銘于碑

潜谷先生神道碑銘終

潛谷先生墓誌銘

正憲大夫原任吏曹判書兼弘文館大提
學藝文館大提學知 經筵春秋館成均

館事趙絅 撰

歲著雍閏茂之九月四日戊戌原任議政府領
議政潛谷金公卒于終南下寓舍之正寢計

聞 上悼恫輟朝三日 遣代言 賜吊又

遣禮郎文以祭之 王世子遣宮官諭祭哀榮
之典摯矣及治窆有司奉 命供葬事用其冬
十一月庚子葬于楊州治東金村里巽向之原

從先兆也太常議謚曰於法勤學好問曰文清
白守節曰貞宜 贈文貞 教曰可粵明年二

月辛巳貞敬夫人尹氏仍哭泣成疾而卒既殯

嗣子叅判佐明氏與其弟正佑明謀曰先考之
葬也宜有幽堂之銘以先妣之疾革也而急於
速虞而反而操藥不遑它焉今不幸又遭先妣
之喪日月有時盡於祔也而備前喪之未備禮
者遂撰次公行狀細大無漏失哭拜授使者北
走春糧外青城山下告漢陽趙綱曰先人之友
唯執事在敢以是累執事不佞方伏枕吐藥而

起與之為禮垂涕而辭曰吾尚忍銘吾友哉去
秋公聞不佞入城即枉委巷牽率不佞於公第
修洛社故事接軟語叙離闊諸公咸以匙箸不
愆持履趨健歸之公公亦不讓豈知轉頭之頃
交臂而失相公耶人事之不可恃如是與吾尚
忍銘吾友也況吾齒迫八轂精力已銷亡矣其
何能噓起已焚之筆硯形容大君子躋勲萬一
恐孤幽明之託也使人曰雖然不得執事筆無
以掩諸幽棘人之摯意也不佞於是屢辭不獲
則起而稱曰公之羣行灼灼難一二數莫若舉

其大者則小者如網之在綱裘之從領茲可以
驗相業之終始矣公自幼有大志十二時讀小
學至一命之士苟存心於愛物於人必有所濟
惕然有動於心因自思曰非必一命之士為然
人固當有是心若濟人則一命以上事也此何
異文寬夫之灌毬司馬君實之擊甕哉公之經
濟之志固自有天得者存奚假外慕其為陰城
縣監也不以官庫為嫌剔祛一縣之病民害民
者惟日不足遂上疏曰固國之道安民為本民
安則國亦安矣願 殿下推一縣之弊以及八

道焉其后為忠清監司也上䟽請行大同其法計田結較上供度官用賦之不齊者齊之役之不平者平之不均者均之損益調劑咸歸大同舊額自在也上下備局議而行之該部持之以為難公慨然曰大同既不行吾徒任宣化無以救民吾其歸與及拜議政也上劄請行大同則規模愈密而言愈切矣上引見公論大同利害移日定為先行湖西使公磨鍊節目公退而揣摩十日而畢為二冊上之後又上劄曰臣誠固陋素昧竒謀異策惟以書之懷保小民

詩之哀此惇獨論語之節用愛民孟子之不如
人和中庸之子庶民大學之得衆得國竊以為
萬世當行之道噫於此見公學之正而宅心之
仁也其所謂均役安民者皆原於其學中來哉
孟軻氏七篇中章句非不多有不言仁政者乎
公之立朝三十餘年䟽劄幾千萬言而無言不
及均役安民則公可謂善學孟子者也以公之
忠之盛志之篤持此說不舍至白首登台鼎而
后乃有所施豈非得君難而遇其時亦難與方
朝廷議行大同也異議鵲起上自重臣下至

臺官如安邦俊者至以誤國斥公公不為動
上察公無他趣該部有司先行大同於湖西蓋
湖西賦役之不平其來久也而一朝得平五十
四邑之民無不叫謹相賀前日之言不便者今
反合口稱媿政信乎金城之奏初是之者什二
三而最后什九也公姓金諱埴字伯厚潛谷其
號也清風之金新羅王者之后也當麗朝官侍
中者曰大猷自是十餘代冠冕不絕至大司成
諱湜經術懿行為世矜式與趙靜菴先生同離
己卯禍生諱德秀於公為曾大父不應薦剡訓

誨後生戶外之屨常滿彌願真子生諱棐於公
為大父仕為軍資判官歷典三邑皆有去後思
贈崇政大夫議政府左贊成生諱興宇公之
皇考也二十成乙酉進士質疑於李文成成
文簡公門同學者皆出其下甲午薦齋郎病不
就而卒蚤夭人皆惜之 贈議政府領議政娶
趙希孟之女即靜菴先生姪孫 贈貞敬夫人
以公貴也 恩先世也公於萬曆庚辰生於漢
城之麻浦第五歲知讀書九歲從贊成公于江
東就芝山曹公學坐立有常處伊吾不已芝山

獨視偉之十一歲遭王父喪持服執奠如成人
擬陶靖節五柳先生傳作六松處士傳議政公
視其文詞大奇之后日執手成書之託由是云
公既喪議政公則轉困窮甚流離蓬轉客無所
之丙申制除間一年遭承重祖妣喪又間一年
太夫人歿前後喪經者七八載使恒人當之即
不毀滅即死翳桑下公猶不以大難大侵斂其
氣力身親負土以完父母率事見者以為不獨
孝感神明稟賦固異夫人甲辰始有室乙巳陞
上庠又魁館試華問彌大太學疏請五賢從祀

多士推公為首文多公筆辛亥恠鬼鄭仁弘螫
晦退兩先生時公為掌議主削仁弘儒籍光海
大怒令錮首議儒大臣爭之強事得已甲寅冬
陰北門雨雪詩隱于嘉平之潛谷帶經而鋤以
自給蓋頭把茅安之若厦屋作老狐羸羗篇以
刺柄奸癸亥 仁祖大王靖 宗祊公用薦拜
金吾郎俄以事罷冬增廣初試居首甲子逆适
無天公犇問至水原 上引見慰諭至天安
特拜陰城縣監秋 殿對為第一冬拜正言明
年遷騎曹負外兼春秋記事官與修光海實錄

俄遷持平改正言司書承 命試士湖左歷文
學持平遷騎曹正郎知製 教丙寅還持平由
直講遷正言獻納時有雹蝗災進言劾元舅具
宏移文學冬還持平丁卯虜寇我西連陷義安
國人咸以為彌牌台戎平壤之民至掛牌於城
堞而走公以文學同不佞請罷彌牌鎮民心仍
從分朝完山久之承 令問 寢大朝只驅一
傳蹙蹙往來行路稱其簡四月遷騎省郎隨
駕還都胡良輔接伴使李弘胄辟公從事公患
皆留平壤數月盡得西民之情偽城池要害與

夫兵農之利害將帥之才鄙敵人之形勢及還
朝上八條疏疏凡數千言皆鑿鑿中端其末
賑饑民 下罪已事有味乎其言之也 上下
備局議大臣嫌其越俎而置之異日 上謂左
右曰金某之言誠有理及經丙子變論者咸曰
如用金某之策安有今日之大崩哉都體察使
金相瑬又辟公從事閱湖西嶺南兵畫分嶺南
上中下三路策即常山陣蛇法也體相稱善而
不能用是歲往來修撰校理者累又轉獻納八
月拜選曹貲外無何陞正郎己巳昇平相進言

曰銓官以彥言拄金世濂銓朋比也 上震怒
命拿勘主議郎公遂對吏其實公息世濂謗
也翌日被絀僦居楊根之瀟川書史自娛無幾
微僇人色壬申叙復原官俄陞應教轉議政府
檢詳舍人拜侍講院輔德還應教改司諫冬用
仁穆王后山陵時都廳勞陞緋癸酉由叅知
入銀臺為同副右副頃之以體府薦拜安邊府
使至則用功令厲儒生嚴軍令較武才才歲餘
絃誦起而挽彊者出矣其它宿弊盡祛惠民之
政尤著道臣以最聞 上賜表裏秩滿附西差

冬至使丙子六月也公曰事不辭難臣職也

陞辭奉表而行七月起柁石多山為文祭海神
八月泊南汛口見陳都督洪範時金兵踰白馬
薄皇都關外寧錦之目未乾洪範裹糧坐甲
而已無意出師公為文遺洪範劈畫奇正激以
大義都督稱歎不已十月始到寧遠見軍門兵
部侍郎方一藻呈文請賀硝黃至皇都禮部
尚書姜逢元來玉河館慰藉良至見朝禮訖
冬至聖節正朝千秋叅班俱如儀外國使臣
曾未有叅班正賀者也而公獨蒙特允異數

也夫以外國陪臣簞幣 天子之庭揖讓周旋
之不失其度幸矣况文能取勝不假譯舌立白
吾 君尊周大義雖中虜國斃不足為恥者有
如公者乎始公因兵部題奏聞虜劫我城下盟
率一行出館門外東向痛哭提督主事嘖嘖不
已 帝命趣叅將領兵二千護送公於是行前
後呈文者十數無一語不惻怛至誠故華人無
不聳聽動心都督監軍至以玉帶文錦奉謝
國王云丁丑六月復 命 上引見文政殿公
以陳都督別帖進 上覽之流涕者良久公於

是請急遶兵議旋拜禮議又遷同副左副公自
朝 天迴朝廷才公之為萬于昔者而 上亦
嘉公之忠八九年間遷官十有三二超授至三
公當大亂之後憫國勢之削弱也生民之塗炭
也災異之屢警也飢饉之荐臻也刑賞之失中
也貪墨之成風也遇事直陳言無不盡提調槐
院時辭疏人所難言者甲申拜副提學劄論官
人咀咒者宜付 王獄正其罪俄拜知申事極
言燔鍼不可施 王體八月拜元孫輔養官冬
奉元孫入藩留藩聞燕京陷作哀江南賦以寓

匪風意

昭顯世子嘗欲治僕御之臯公諫

世子即止仍進曰

皇朝事慘矣臣頃歲奉使

目見貪侈成風不亡何待願

邸下以此為殷

鑑焉公奉元孫到松京中使金仁來口宣

上

教曰聞元孫還無毫末敵事長者所為異於他

人予甚嘉之十一月拜刑判辭之甚

上不許

獎答乙酉清使護

昭顯世子行來公出儐命

守不悅曰此老為儐吾失所圖矣四月差

昭

顯世子墓所提調撰哀冊文以進

賜廐馬俄

拜右叅贊改大憲轉大宗伯兼內局提調丙戌

二月 上命招三事六卿議姜罪律領相金瑬
與諸宰三 啓陳恩義兩全之道 上沛焉震
電金相趨出諸宰亦隨待 命闕門外明日
上以徑出削黜李相敬輿公以義不可使李相
獨當請與同臯䟽未上 上已命適公本職及
內局提調無何監試試官 命牌至赴 闕上
待臯䟽是年夏赴北京竣事還清人執亡命者
林慶業與之慶業從者一口逸坐是落職丁亥
由都揔管拜松都留守公以為開城是王氏五
百年舊都人才之藪通諭府中縫掖建成均兩

庶稟諸朝設教官講讀以時春秋行釋菜禮
躬行薦裸興俯彬彬可觀焉於圃隱先生殉節
許立成仁碑刊孝忠全經魯論正文以正蒙養
行養老禮末期月俗幾於一變矣己丑正月入
洛社三月秩滿北上府民之髫髻相率而攀車
車為軹夏自壠下聞上候違豫竭蹶入城五
月遭賓天之痛大臣稟于世子以公權禮
判時通喪初出議禮諸儒俱曰余知不啻聚訟
公持衡其間不眩不撓終始守先王制禮或
於無乎禮者之禮補以義起斟酌損益俱經

審財定其去就人不得以汰裁加之八月拜都
憲九月進拜右議政再疏辭上優批敦勉庚
寅正月歸平丘八疏辭適三月作燕行辛卯正
月拜首相兼摠裁官纂仁祖實錄公都相位

率所事所言非敬天安民即必嚴賢邪之別俞
蔡趙錫胤遇眚灾建解之李時楷逞憾戶判李
時昉推內陷穽公白上曰時楷亂政大夫不
可不屏諸上從之癸巳黃海監司金弘郁以
妄言下吏將鞫廷臣壓於天威縮頸莫敢出
一言公進曰弘郁臯固有之入死則大傷君

德具相仁厚亦請減死 上大怒明日 特罷
具相公上疏曰寬弘郁之言臣實先發臣敢獨
免遂呈告至八乃遞拜判敦寧已而進領敦寧
乙未七月又拜領議政上劄辭 上不許再劄
極言兩南魁虐民力單竭三劄言朝廷不尊人
人陵蹙大臣時延陽李時白綾川具仁厚彼時
措之甚之而去也凡五上劄言愈切而辭愈力
上乃批以勉副十一月 上為 慈殿將營
別殿於欽敬閣故基公上劄陳一不便二不可
辭直義正 上下備局議備局格之丙申二月

公登對進言曰近日太白晝見白虹貫日裁之甚且慘者前史罕見願罷嶺南伍保湖西築城以為祈天命結人心之本九月又上劄論西南風雷之變曰殿下遇災修省無歲不為而獨於千人渰溺聖廟頽壓以為是適然移臯於邊閫武夫又曰當事之臣上意所向惟恐其不順民心所願惟恐其不背又質言推刷太過修理役夫死傷者多劄入上初下溫批俄又再批辭旨甚嚴公出江外待臯上用大諫閔應亨應教李慶億言遣史官敦諭丁酉五

月旱求言之 教下公上劄復申益愈其末曰
臣之更進前日之言猶瞽者顛躓復起而尋前
路也聞者以為非大忠口無是言爾七月又上
劄請通行兩湖大同曰臣於前日並兩湖田結
米布數籍記而藏之僚貲皆習其事若推移變
通如千条不費時月而便行矣九月先是 上
又命公監改 宣祖實錄至是實錄成洗草
賜宴訖 賜鞍具馬明年二月 上命有司定
行湖南大同公再上劄綜核品式辨別有無海
物之錯錫貢橘柚皆從任土餘悉倣湖西有差

全南監司權竭狀 啓言民情不便而僻違不
慤 上命罷竭職六月 上違豫公戴星問
安屢日遂患中虛暴下猶上劄論安民設倉利
於轉漕七月 上引見諸大臣公亦進見 上
謂公曰卿何瘦似之甚公遜謝已攀 搨而前
曰今年凶歉兩湖為最湖南均役不可少遲明
日 上謂左右曰憂念國事皆如領敦寧國豈
如今日乎八月公泄痢漸革召孫錫胄把筆口
占遺疏幾二百餘言勸 上心學選良士輔導
元良保民戢兵斤斤有序又薦徐必遠必能

任湖南事

上覽劄且驚且慮

批曰所陳無

非格言至論且湖南事予意已決卿又得人而
付之又何憂卿雖老筋力尚強神明所扶豈無
勿藥之喜卿其安心善攝醫問交道公將及奄
奄而諸公問疾來則必整冠危坐勞苦如平日
徐必遠來辭諄諄託本道大同事願令公勉旃
吾死無恨送言于同里鄭相國曰湖南事業蒙
上許願相國勉力子孫擁坐皆泣公止之曰
吾年位已極荷 聖恩醫藥盡良有何憾但念
畿民小勞耳顧兒孫曰汝輩勉讀書及正寢未

安而啓手足君子之正終也於乎臨大終而不
亂在人則難於公未為特操獨公之君民一念
著於心七十年如一日則將天下一人也公天
資端確雙眸炯炯精采即見與之游者無不許
其恬靜自守而至其深識長慮能保民活國於
股掌之上則知者鮮矣蓋其信道篤而自知名
貫窮約富貴而不易其心吾所為是也雖驅世
而嘗教不動一毫雖人主而疑而不悅不為詘
勇徃直前案不顧吾身之利害榮辱故上亦
久而信之生則曰赤心憂國可質神明歟則曰

安得擔當國事如金某者乎嗚呼此可以觀君
臣矣如使公假之數年卒以究宣其志之未卒
者豈止澤湖西南民一國其庶乎公以誠敬篤
實為行身欄柄故在公朝必危坐髀不動搖與
享祀植立享所踴步不差昇平相見公早衙曰
老夫平生以早衙自許今於金尚書讓一頭又
儉勤天性也冬不御裘食無蕪味雖在耆耄雞
鳴而起日有課讀周人之急甚已之私拯無辜
表節義如不及李統制壯烈人則日遠易忘公
建白令官相其樹碑元助防豪韓南平楯俱死

事於壬辰公於元請 賜謚於韓獻議請褒

贈居昌珍島人有冤公復力請伸之公又內行
純備實有大過人者公姑宜人金氏嘗語子弟
曰吾未嘗見汝父之受訶責於父母也公少時
喜觥飲 贈公見而戒之遂終身口不近酒卮
公常以祿不逮養為恨值終身之喪必感泣終
日昧爽必冠帶謁家廟非甚疾不廢館嫠姑畜
孤弟能敬而教事從祖忠簡公權無別家尊忠
簡戊午正議公所贊也曹芝山即世數十餘年
撫其孤若兄弟訂定遺文行於世成牛溪墓在

坡山公行過是路則必下馬禮焉公逾七以來
致仕疏十有餘章終不得請則有詩曰侯三萬
戶足於良官領敦寧我豈當願棄人間之事去
清平江上濯滄浪不佞嘗評公闢寢門待朝有
文子之敬焉喜居湫隘有晏嬰之守焉持廉至
死有孫叔敖之操焉懇懇章奏有陸敬輿之忠
焉憂國忘家不讓於祭征虜自始學至病未嘗
去書不看有過於權德輿無不及焉湖西民間
公亡相吊於野曰吾其如何其為士者操文來
哭趾相齧圻內書院儒生亦來哭吊公內子貞

敬夫人尹氏高麗侍中華達之後父諱汲蚤歲
以文鳴壬辰難遇賊母夫人投江水公援之不
及蹈水而死 宣廟朝旌閭夫人自幼婉孌有
異質及配君子奉蘋蘩撫妹弟俱盡其道尤善
於女紅使公忘貧賢可知也公之終也勺水不
入口者累日既返机枕塊朝夕臨一如諸孤女
官承 命為請從權見夫人哭泣之哀不敢發
口而去於是君子知公至行又刑於閭内也公
有二男四女男長佐明再登文科歷吏曹叅判
次佑明進士仕為正女長適金崇文次適黃道

明僉正次適徐元履留守次適尹鑑佐明娶東
陽尉申翊聖女生一男一女男錫胄進士狀元
娶右議政李厚源女女趙顯期生貞佑明娶承
旨宋國澤女生四男二女男長萬胄次錫翼
錫衍錫達幼女長 王世子嬪次幼外孫十五
人柳澂監察李尚淵掌令吳斗寅妻者金崇文
出也鑑鑠福昌君夫人黃道明出也文重生貞
徐元履后子也商隣商賓商紳鄭啓周妻者尹
鑑出也餘幼不載公為文章自結髮淹貫經史
晚好洛建諸老書凡告君之辭明白平正必以

仁義為主騷賦與詩亦皆有致然恥以詞藻嫖
嫖危得文衡而去之且於六韜兵略星經地志
五行之書無不通焉嘗論西洋曆法上自洛下
閎下至唐宋元改曆事如指掌又豫言吾過戊
戌難果然是與杜杞之自推其數相符異哉所
著詩文約十卷有集杜詩有感興詩皇明紀略
類苑叢寶種德新編海東名臣錄已卯錄松都
志刊行于世攷事增刪潛谷筆譚藏于家銘曰
股肱于辟秉國之均 職思其氏實在於民
公鼂佐周稼穡是陳 鄭侯相漢養民是先

於維潛相允厥緒傳
懃懃章奏井井平賦
若衡之懸斤兩莫誤
若度之設長短奚錯
昔竭廬入讎賦不足
今垂橐遑官不我喝
孰謂瑟膠更不時月
湖山千里民抃阡陌
繫公此勸由我聖辟
主聖臣賢何牖不約
國朝賢相亦多儂指
如論一德孰公與比
所貴公忠生死不匱
所貴公心貴賤若一
地雖肺腑門則濯熱
足踐岳廊鼎烹藜藿
淑哉夫人輔公治內
上下德曜圖史迭對
婉德娠賢鵠鸞交翔
劒合重泉遊聖歸昌

潛谷先生墓誌

我銘玄石賢夫婦藏

十七

潛谷先生墓誌銘終

潜谷先生行狀

嘉善大夫原任弘文館副提學兼經筵

叅贊官春秋館修撰官李敏求撰

大匡輔國崇祿大夫議政府領議政兼領

經筵弘文館藝文館春秋館觀象監事世

子師謚文貞金公行狀

高祖諱湜成均館大司成博學力行魁薦科與

靜菴趙先生併禍贈吏曹叅判

曾祖諱德秀家難不仕贈吏曹判書

祖諱裴典三邑有惠政卒官軍資監判官贈

議政府左贊成

考諱興字成均進士受業栗谷牛溪兩先生之門早世 贈議政府領議政

清風之金系出新羅其後世繇麗逮鮮冠冕不替始議政公聘漢陽趙氏縣監希孟之門以萬曆庚辰生公諱堉字伯厚幼聰穎自離髫髻靜專若成人雞鳴起讀書端坐不遊目有識已期以遠到為文詞犖然有奇氣歲甲午議政公疾革顧言曰兒能樹立成吾家吾魂魄亦當有知公既早孤域內兵荒流徙湖甸躬負麥以為養

常千里徒步省繼祖母海西既而繼祖母亡太夫人又亡七年舉三喪操畚鍤以襄大事哀感行路制除積毀未復乙巳始陞上舍掇科目有聲士論咸推重館學請從祀五賢舉公名冠多士及祀典行鄭仁弘藉形勢詆晦退兩先生諸儒削仁弘儒籍光海怒錮首倡者公謂吾為掌議烏可擿指其人將上書請混彼其罰會以諸大臣言得已公見時事日變盡室就加平窮僻處親行耕稼因號潛谷賦詩見志若將終身居十年癸亥內難平首先舉遺逸拜金吾郎甲子

春逆适稱兵公時家居犇問于道次超授陰城縣監治一誠不懈上疏條積弊因言國以民為本願推一縣之政以及八路其在小官已欲知無不言而施措布置端序可見其秋擢魁科徵拜正言邑人為豎石紀德婁遷兵曹郎正言司書文學持平知製教至有七八拜者遇事爭論棘棘不阿即事關勲戚不肯依違時觸犯忌諱亦不顧望其請罷號牌以靖民停校生鰲軍以獎蒙學特其細也歷四年丁卯胡太監以帝命至僨使李弘胄辟公從事由是熟諳關西

利病疏陳數千言有曰歲荒民飢人心離散而
謀國之言一不及此策有二三必用最下者譚
者違之又以體察使幕佐視師南服請分嶺南
三路以便節度歷修撰校理獻納為佐郎吏曹
陞正郎已巳秋銓官議金世濂郎薦有所左右
大臣以為言逮公下理公既坐法歸瀟川成小
築遁然自適經二年蒙叙悉復原貫轉應教檢
詳舍人司諫輔德用 仁穆太妃山陵勞進通
政階癸酉由叅知拜承旨 在銀臺出納惟允苟
有間隙讎書稽古以至卜筮曆象方技鍼灸之

說靡不研究未嘗見食息自暇其冬外除安邊
府使至則厲學政講武藝已責恤刑弊祛而化
興治以最聞內賜表裏丙子考滿差賀至使
海役衆所懷懾公履險愈從容無變度八月泊
南汛口時清兵已踰白馬薄燕京陳都督洪範
坐甲關外公移書激以大義洪範愧謝而已天
下魚爛聘覲禮廢唯公嚴程竭蹶及期獻見禮
部尚書姜逢元就館慰藉之甚醴留館踰冬凡
呈文閣部者十數皆出款實既聞本國中虜危
辱東向慟哭華人環視感涕畢事還帝勅兵

部以兵二千津護出海道拜兵曹參議移禮曹承旨公久宦臺閣隨事審審無已而其所展布才猷見於按節湖西屬時艱虞凡條奏設施動中肯綮而自非活國大計姑可略也公通筭一路田役率收米布以應上供百役留州調度名曰大同既無官吏操縱闊狹法簡易循而色目大省疏請朝廷力言其必可行竟為當官所格蓋公幼時讀書至一命之士苟存心愛物於人必有所濟乃惕然內契以為治國必先安民秉心堅懇有不可奪者大同既不得施用則愧無

以全濟窮餓連章乞免入朝荐更叅議禮兵無
大司成為承旨積前後三載歷大司諫副提學
特授右尹躡嘉善階實癸未歲也改副提學
都承旨禮兵吏三曹叅判兼管備邊宣惠等局
甲申擢刑曹判書 世子賓客乙酉監 昭顯
世子封墓撰哀冊 賜廐馬拜右叅贊大司憲
禮曹判書丙戌春 上因論姜氏罪 下嚴旨
于諸宰公隨大臣胥 命闕門外 上益怒解
公職及內醫提調旋奉使如燕沿途有感慨錄
寓黍離麥秀之感明年留守松都專意作成人

材改建黌舍兩廡殷勤講誨春秋二丁釋菜必
親即圃隱殉節地立成仁碑刊布孝忠全經魯
論正文行養老禮軌度可觀己丑年登七秩入
耆老社夏五月 仁祖棄羣臣公權判禮曹諸
儒執已見言人人殊公守 先王定制無變邦
禮始完九月晉拜右議政力疏控解既出焚黃
于平丘先塋又上辭章十餘本仍援禮乞致仕
上輒下溫批有曰予之視卿猶砥柱卿之求
退如急流公曰捨一介老病之臣成 聖朝退
讓之風豈非義事遂逋再赴燕既復 命即還

平丘求去益力又因灾異上言遇灾而懼則灾
可弭求言而用則言可致懼而無誠是欺天也
求而不用是欺人也辛卯以後三都上相一意
求去乙未之拜終始固辭不出然遇事非違雖
在散秩必抗章爭論或於登對指陳黑白無
不剴切其請罷湖西之安興築城嶺南之東伍
給保御營軍番上宿衛各鎮管新設營將皆所
以蘇民祛瘼愛惜邦本而至推刷之政騷屑益
甚則上劄極言萬壽別殿將就欽敬閣故基則
言一不便二不可辭意甚正朝廷雖未盡用其

說 上諒公忠鯁篤至嘗曰夙夜憂國懇懇血
誠安得如金相國者乎 當寧興懷至公沒不
已嘗論李時楷亂政之漸以靖朝著又言朴長
遠離親北竄情理可矜移配內地金弘郁疏論
姜獄冤罪至大何公以為應 旨進言既許貫
罪宜用次律具綾川仁垵繼請其死 上怒罷
仁垵職公乞與同罪不得則力辭乃釋位前後
總裁實錄監 祔廟冊禮行禱兩社壇俱蒙鞍
馬之 錫公始大拜有進言行兩湖大同者公
乃建白湖民方困於賦役急宜通變解懸 上

曰公進安民均役之策不得不任其責公遂欲
率諧素志開陳分析擘畫制節無纖毫滲漏書
既成上下講摩訖三年乃定行之湖西其民鼓
舞猶拔水火而奠衽席相與樹穹碑衢路千里
頌義無窮其未行也衆口沸騰至訾以新法公
為不聞勇往力行利害之源豈人人易喻哉君
子謂良法可為也機會可乘也若公之明見積
誠不沮不撓以底于成為難能也朝廷方議行
其法湖南而公已寢疾乃上遺劄勉以進學保
民而末乃眷眷於湖南大同暨公歿而公之志

益伸德澤加于永世可謂古之遺愛矣公之延
登年已至矣致政之請歲必屢上或縷縷於造
席時值多故國家方倚柱石竟以戊戌九月卒
于位計 聞其吊祭贈贈視禮有加官庀喪需
葬于楊州金村坐乾之原從先兆也太常議謚
以勤學好問曰文清白守節曰貞 贈文貞公
公始喪塗巷皆咨嗟失聲諸書院儒生來哭甚
悲而湖民尤絮泣相吊公資勁正操履端確罕
言語人不可以親踈嚴於自治絕去惰慢危坐
竟晷未嘗傾倚偃仰少喜劇飲一聞先公垂誠

終身不接盃勺晨起必冠帶謁廟寒暑不廢篤
於倫理待寡姑弱弟敬愛備至性修潔屏遠聲
色冬不御裘食無蕪味唯於仁民澤物之務汲
汲如飢渴在湖西刊救荒撮要辟瘟方請分布
諸道終始言水車之制用車之便鑄錢行貨之
利鋟已卯八賢傳及黨籍內外世譜少受業芝
山曹好益及貴撫其遺孤有恩酷嗜書無旁好
既躋大耄猶日有程課無通星經地志五行七
略嘗論西洋曆法以及歷代改曆源委如指掌
所著有詩文若干卷皇明紀略類苑叢寶種德

新編松都志等書媿貞敬夫人坡平尹氏進士
諱汲其考也幼婉孌合婦則二十歸于公躬織
紵奉烝嘗至老尊貴不變及稱未亡人迫欲滅
性下從却不御水漿中大人以內命來勸滋
味見毀貌哭泣不忍發口以己亥二月卒壽七
十五祔公葬生二男四女男長佐明吏曹叅判
次佑明國舅封清風府院君女適金崇文僉
正黃道明留守徐元履尹鎡叅判一男進士錫
胄一女生貞趙顯期妻國舅四男二女王
妃殿下為元女男萬胄天次錫翼錫衍錫達曰

柳澂監察李尚淵掌令吳斗寅妻為崇文出曰
鎰鑠福昌君夫人為道明出曰商隣商賓商紳
鄭啓周妻為尹鎡出嗚呼人臣患遭逢之難遭
逢矣又患無才以幹時苟才足以立事而約以
檢身誠以奉公忠以殉國勤以成務大臣之節
於是備矣惟文貞公進塗既闢受二聖特達
之遇知無不為言無不盡功顯業著百姓載其
德雖春秋所稱曷以踰焉謹据家乘所錄刪繁
舉概敬告于當世之立言君子有以考信焉
潛谷先生行狀終

湖西宣惠碑銘

嘉善大夫前弘文館副提學李敏求 撰

崇政大夫行議政府右叅贊吳 竣 書

均田出賦自三代大備九一什一實王政之大
經逮世下衰貪暴作而民無所措手足至秦廢
井田開阡陌而無井極矣先王惠鮮之道又何
可言也我國介處山海地狹隘方里之制既無
所施用則父師聖法概見於西土一區而止耳
陵遲千載民日益以困其始制地者隨其田所
出為束者十為一負為負者百為一結計結出

米及布以應公家之賦由是而收之不暴用之
有節則亦不悖於助徹之遺意也惟其任土之
貢一切取米布百物調度之須以至蹄踵門戶
之費率倍蓰以征而邦本悴矣往萬曆戊申年
間完平文忠公始為大同宣惠之政用之於畿
輔而畿輔蘇後二十年丁卯吉川君權公盼為
湖西觀察使時則湖西民尤敝於畿輔權公乃
取完平之意平停一道田役出入劑為絜法事
未卒行籍以藏之後十二年戊寅故相國金公
實按是道發視其籍歎曰活民之方不外是矣

早夜以思忘寢與食擘畫籌度纖悉畢舉入朝
未幾為今 上初元位遇益隆晉登鼎席殷勤
啓沃之暇首先以是說進 聖上灼見利害之
源凡所施設綱要唯相國是聽於是弭其局大
同廳延城君李公時昉亦為叅畫其為法通筭
一路田案邑無問大小唯視結數多寡結出米
十斗舟運上江其山僻遠海州縣准米出布咸
委輸于京師自 御供奉 宗社祀享接賓客
凡百需用細至芻稈薪蒸之屬皆於是取辦官
無所闊狹弛張吏無所伸縮乾沒無更賦有常

調民得服田安業以春秋二時具其物趨期會
暇則養老育幼嬉娛田里歌詠 聖治而已行
之九年民以為便夫文忠公為惠未徧吉川公
徒籍莫施唯金相國與李判書能踴意於事功
衆訾而不恤羣沮而不顧講之彌精守之彌堅
解萬姓倒懸之急建一方常安之策 朝廷方
推而行之湖南其利不可以一二數相國之為
德於民吁其盛矣嗚呼相國操仁民之術 聖
上恢敷施之量上下相須迄臻厥成相國之遇
聖上可謂千載一時矣昔當陽侯杜預請建

富平河橋羣臣多異同者橋成武帝舉觴屬預
預曰若非陛下之明臣無所施其巧後世不稱
杜預之績而唯歸美於武帝今大同之法實大
造于民豈特一河橋濟行旅而已雖然君天
也天不可以形容大德則樹豐碑于衢路以稱
揚相國之美亦湖民之志也相國名埴字伯厚
清風人其為相專以憂國奉公為務銘曰

扶蘇舊壤海流于旁

環塲千里厥土燥剛

農功鮮效嵒窳薄生

一困于歲溝壑靡寧

勞耕苦穡稅入卒殫

畦征畝權民食阻艱

天監在下 大聖爰作 聖作伊何從以輔碩
以登我 辟以惠我人 更絃易轍為法于仁
廉收簡歛毋罄而藏 粟米布縷取一而贏
春秋供事灌于司會 歸安其室狗夜不吠
徐起視野禾茂麥秀 朝夕鄉井老老幼幼
自今伊始迄于永世 既飽既佚相國是賴
匪相國是賴 聖后之德 衢謠塗詠曷以報塞
孔樂南土豐碑有揭 我鏡斯文頌義罔竭

湖西宣惠碑銘終

